

COMUNICATO n. 3068 del 26/10/2023

Traduzione in ladino

Percorsc de scola ti Paijes che no fèsc pèrt de la Union europeèna: l'é stat aproà i criteries per l stipendium

Engaissèr la mobilità di studenc per tegnir su i barac linguistics e culturèi anter i joegn de dut l mond, chest l fin del avis aproà ai 20 de otober da la Jonta provinzièla, out ai studenc de la seconda di licees trentins de cater egn e a chi de la terza de la scoles autes trentines, che i vel jir a studièr te un Paisc fora da l'Union europeèna, per vèlch meis o per dut l an de scola 2024/2025.

L finanziament l'é de € 700 mile euro, per n numer de presciapech 80 stipendium. L intervent l'é deldut finanzia da la Proviniza autonoma de Trent e, respet a la scomenzadives di egn passé, chest an l avis l perveit na integrazion per didèr i joegn con pedimenc che vel tor pèrt. Se pel fèr la enscinuazions dai 7 de november enscin ai 7 de dezember del 2023.

Destinatères

Vegn ametù a la scomenzadiva i studenc che:

- chest an de scola 2023/2024 i fèsc la seconda di licees trentines o la terza de la scola autes tel Trentin o fora de provinzia;
- che no i à più che 20 egn;
- che i é enciasé te la Provinzia de Trent;
- i à na condizion economica con indicator ICEF 2023 de la Domana Unica 2024 mender che 0,60.

Vegn paà l stipendium demò se vegn fenì su l an de scola 2023/2024 senza menciazes de formazion.

Olà

L percors de scola a la foresta l cognarà vegnir fat te na scola con senta te n Paisc fora da l'Union europeèna. L student pel se endrezèr sie percors coche l vel, l pel per ejempie, se emprevaler de la proponetes de mobilità per i studenc portèdes inant da l'istituzion scolastica da olache l vegn, se enscinuèr a programes a la foresta metui a jir da enc, sociazions, agenzies che laora tel setor de la mobilità per i joegn, se projetèr l percors col se troèr fora enstes la scola foresta e l cartier.

Regnèda

La regnèda del percors de istruzion la pel esser de dut l an (240 dis minimai) o per na pèrt (110 dis minimai).

Prejentazion de la domanes

L avis se pel se l desiarièr dal sit www.vivoscuola.it. La domana la cognarà vegnir fata demò tras prozedures telematiches se emprevalan de la SPID (Sistema Pubblico di Identità Digitale/ Sistem Publich de Recognosciment Digitèl), CIE (Carta d'Identità Elettronica/Document de Recognosciment Eletronich) o CPS (Carta provinciale per i Servizi/Chèrta provinzièla di Servijes), con scomenz da les 9.00 da doman de en mèrtesc ai 7 de november enscin a la 13.00 domesdì de en jebia ai 7 de dezember del 2023.

Traduzion di Servijes Linguistics e Culturèi del Comun general de Fascia

(cdt)